

武溪集卷第十四目錄

表上

乞外任狀

再乞外任狀

免知制誥狀

免判銓狀

免知諫院狀

免史館修撰狀

第二狀

吉州謝上表



乞分司狀

謝分司表

謝轉光祿少卿表

讓南班第一狀

第二狀

謝轉衛尉卿表

虔州謝上表

桂州謝上表

乞解職行服狀

第二狀

武溪集卷十四目錄終

武溪集卷第十四

宋工部尚書克集賢院學士贈尚書左僕射累贈

少師謚襄公余靖著

表上

乞外任狀

臣誤被採擢待罪諫垣自揣空疎無以上報去歲嘗與蔡襄皆以親老願除家便一官庶就侍奉聖慈寬裕悉蒙厚恩蔡襄給假還鄉臣某特賜縑帛仍令差人迎侍歸京奉養仰荷非常之恩足爲私門之幸事出望外捐軀不忘今春得臣父書候秋與孫男迎娶

武溪集 卷十四
乃能卽路初領此訊誠亦有待其來今聞蔡襄父母
不忍去鄉國惟襄獨行還朝伏緣蔡襄躬自奉迎尚
猶不至微臣差人般侍必更遷延在臣私心進退無
措伏念臣備職諫諍言多過差老父衰年遠在南土
上不能補國家之闕下不能展庭幃之私何顏自安
久玷清望陛下憫此遠迹諒其素心俾臣先盡事親
之誠徐圖報國之効在於出處不陷憲章伏乞特受
臣泐流家便一郡差遣以便侍養庶當孝理之朝未
缺人臣之行若謂臣兼領史職不當差出則葉清臣
楊察等差出已有成例但臣無任 云云

再乞外任狀

右臣近有奏陳願授家便差遣雖堅誠請未蒙朝旨
允從伏以國家之意謂臣身忝諫官日言國事今一
旦無故卽除外任恐四方傳聞以爲不容諫諍不忍
遣去蓋惜朝廷之名伏念臣生長遠方不識忌諱頃
年得罪但坐多言再表乞歸乃得近鄉小郡曾未逾
嶺母氏已亡服終還臺卽求外補願歸江國稍便家
庭庶因斗筲之祿用勤晨夕之養而國家權俾掌禮
因得奉朝去春忽被命書猥叅諫列言不經務盡忠
無益於時才非出人論事不能無過尋瀝私懇仰干

宸嚴但緣偏親向衰乞以寸祿就養遽蒙天矜特賚
帑縑俾爲奉迎之資不許脫然而去實逾半載親與
未來尋已啓陳未奉俞允伏惟聖神在宥俊又如林
才過臣者比肩疊跡臣去此職必當得奇士開益聰
明如或惜去朝之爲重恐外遷之差屈則乞令臣帶
小省之官爲名城之守上以昭陛下從諫之盛德下
以成微臣養親之私榮中外聞之自爲至美之事固
於朝廷無所虧損但臣無任 云云

免知制誥狀

右臣准閣門告報已降勅告授臣守依前官知制誥

知諫院者伏念臣遠官孤跡本乏才謀朝廷誤知擢
在諫署闕失之政無所建明柔佞在庭不能指擿前
兼史職已愧踰涯進典命書愈知非據况侍從之列
當以才升諫諍之臣不宜速進臣積歲未久無善可
稱全身免責固爲優幸非次被寵豈免刺譏且累上
表章乞便侍養卽蒙遷授難以請行臣之私心不期
冒進未能揣分何以宿官乞廻濫恩以抑奔競其所
降勅誥乞賜指揮回納中書謹具狀陳乞以聞伏候
勅旨

免判銓狀

右臣奉勅差權同判吏部流內銓者竊以先朝初定諫員不兼他職蓋使專於論議庶或補益聰明臣叨掌書命已增憂愧若更兼領銓管則恐智慮不周力小事叢必致顛隕其上件差遣伏乞停罷謹具狀奏聞伏候勅旨

免知諫院狀

右臣昨蒙恩授臣依前官知制誥知諫院及准勅差兼權同判吏部流內銓臣再有狀乞回納勅誥停罷差遣各奉聖旨不得辭免今依准聖旨被受訖伏以朝廷建置諫官俾其論議得失乃是分判忠邪升擢

賢俊之路臣在官歲餘謹言無取得免黜罷已是優恩今擢居侍從而復兼此職乏自知之分塞後來之途於臣之身則讒邪有窺伺之端於國之體則俊良有滯留之歎伏乞罷臣諫職以避賢路

免史館修撰狀

右臣准閣門關報蒙恩授臣史館修撰者伏緣修史之任須得良直之才如臣空疎豈堪選擇兼臣去年以來爲父年老在遠累狀陳乞外官以便侍養伏蒙聖慈賜臣纁帛許令差人搬迎歸京侍奉後來得書雖已在路切恐衰老之年不能久居京國將來却乞

外任是臣虛受國恩所有修撰之職不敢當克伏乞
特賜指揮閣門回納勅告但臣無任云云

第二狀

右臣昨蒙恩授臣史館修撰尋以前後累狀陳乞外
任以便侍養不敢虛受國恩乞賜罷免准本月十九
日中書劄子奉聖旨不得辭讓伏緣君命再三不敢
煩瀆已稟朝旨祇授勅告訖切以爲臣之節惟君所
任不避煩難固其常理然而材器有限又湏量力若
貪榮慕進不知其分一職有曠不稱所委豈獨身災
兼傷國體臣今兼職數處於臣之身實爲榮幸量臣

之力必不能堪除諫官已有定員候正官到闕自當
省罷外任况吏部甄別流品不可因循史官考尋事
迹又宜周備獨當一局猶恐不精兼領二司必致疎
畧臣伏見田况歐陽修皆筆力傑出才過臣者各釐
外務不用所長伏乞指揮推擇其一代臣此職臣不
以內外甘就煩使其史館修撰勅告臣欲親自齎赴
中書送納謹具狀陳乞以聞伏候勅旨

吉州謝上表

臣某伏奉五月十五日勅命差知吉州軍州事放朝
辭取便路疾速發赴本任者天鑒素誠特從輕典星

馳卽道已屆所臨尋於某月某日到州赴上訖申謝
伏念臣生自邊州闇於時務謬從科試早玷書林陛
下擢臣於遷謫之餘寘臣於諫諍之列匪由言薦特
出宸衷而又掌西掖之訓詞執史官之汗簡推寵過
分非臣所堪自惟疎賤之中孤直見進思所以報知
無不言補朝政而未工爲身謀而已拙讒謗不恤用
酬主知論議所伸寡與勢合常欲引去以免衆猜豈
意發於樞機自起瑕譴然念間者夏臺效順再稟正
朔虜帳怙強沮我封拜徇虜約則西戎怨納夏款則
北狄怒重師宿境湏我報音人人異論必有兵禍聖

慮獨斷柄臣僉謀授以聘詞擇於朝列有死不避見
選於臣單車卽途送者失色握節以往敢望生還歷
階而議所期理奪王命旣達而國體獲伸胡兵自交
而戎盟兩就此乃廟堂成筭非臣之功及乎單于罷
兵穹廬報聘謂知前議再俾理裝臣亦讓以非才辭
不獲命漢使荐至虜中甚歡迎勞尤勤宴犒加等蓋
重隣好非私臣身旣頻到虜庭欲練胡事上則接
談於賓主下則訪事於輿隸示相親狎則務通其情
所臨機會則未常屈禮本謂六蕃之語可以博習豈
料一言之失不能免罪仰冀宸造鑒無他腸竊以臣

素乏時名猥遭天睠出於孤官而延登近班豈無群材而專聘絕域蒙此寵任人所忌嫉而不慎言語自罹憲章計其所犯死有餘責此蓋伏遇皇帝陛下至明御宇廣覆如天凡曰近臣非有大故不忍遐棄止除外官含容之德過於堯禹况夫廬陵古郡南近家庭臨民侍親不為失所戴荷恩育寧可貲度方今邊警雖息民力猶困賦歛加疾而吏以為德刻削已甚而上不能知若得詢其疾苦思所放設蠲去橫取率循舊規朝廷聽而從之豈以地狹為恨體國安民圖所報效臣之願也無任

云云

乞分司狀

臣再瀝血誠上千天聽退量煩瀆甘俟誅夷伏念臣生於鄙遠素無才識束髮從宦二紀于茲遭時見用遂忝清近然念臣頃蒙擢在諫垣累上七章乞免諫職出就外任以便侍養皆朝廷不賜允許及至去年得罪不敢迂路歸鄉又緣臣父年漸衰老不樂遠出尋曾乞移便郡願解近職私誠雖切未聞報可臣揆才至薄負罪則深上無補於國家下闕奉於溫清一身之責萬死何逃臣今欲乞落職分司歸鄉侍養伏望天慈特賜矜允

謝分司表

臣某言與奪者朝廷之大柄出處者人臣之大力成命自天退身得地申謝伏念臣鄉邦遐遠世系孤平偶自童觀卽親儒術尋師千里備歷險艱志學十年廼得科第國家頒制目以求士開文館以待賢臣之非才咸預茲選每守孤直不事貴權蓋嘗忤旨而謫官尋亦知名而見用降發中之詔擢居諫諍之聯以出疆之勤延登侍從之列願宣忠力以酬萬乘之知屢被國恩自忘五穀之賤多所論列罔畏仇嫌臣旣拙於周身毀者得以銷骨惟期退避屢抗表章帝座雖處九重之深皇明遠照萬里之外預頒明命克遂初心此蓋伏遇皇帝陛下天覆無私乾剛獨斷念臣嘗經驅策不避艱危察臣本以公言構成私隙俾從散秩歸奉所天下以成微臣就養之勤上以全陛下退人之道丘山荷賜冰炭在懷

謝轉光祿少卿表

臣某言告今月八日進奏院遞到勅誥蒙恩授臣光祿少卿依舊分司南京韶州居住者居深坎窞恩出天慈俯念戴盆之幽莫遂循牆之讓申謝伏念臣稟受愚暗生長遐荒爰自弱齡幸親儒術未脫飯牛之賤

敢思糜爵之榮蓋遇國家海宇澄清仕途寬裕高則
賢科射策採卿相之材次則卿品薦能分甲乙之選
小吏計年而進考商人校粟而論資戎旃奮起於卒
徒勲門澤及於僮隸廣爲甄錄庸贊治平所謂得人
而昌何云數路而已由是例趨貢籍偶中文程逮于
壯年再膺詔目遂陪邦彥久服朝紳亦嘗預刊前史
之闕文叅修當世之大典載筆而書言動抱藪而正
禮儀補衮職而蹈無諱之譏冒兵鋒而使不測之虜
叙其微效擢在近班言思報國之忠身罹負俗之謗
箐中之辱昔賢亦有非辜日邊之遙卅誠無以上訴

退分冗秩還侍親庭鴈鷺久費於稻梁禽魚幸返於
林藪採蘭潔膳聊同孺子之歡種樹灌園誠爲拙者
之效永言毀廢當絕照臨豈意恩波下霑窮轍此蓋
伏遇皇帝陛下純仁廣覆至治旁羅一物未泰而比
之納隍羣賢雖積而勤於頓網順民心而敷治因天
瑞以建元溥念臣工衆罹罪罟重爲緣坐輕或詆誣
凡曰瑕疵率加湔洗樂羊居外靡開盈篋之書陳平
有謀不問受金之過如臣遠跡素乏異才進本孤根
退因積毀所嗟聖世遂作錮人徒成畫餅之名莫展
鈇刀之用忽蒙零露之均澤恐使當春而獨枯苟非

造化之恩寧及沉寔之地唯知死報無路捐軀但臣
無任云

讓南班第一狀

臣今月二十二日准韶州送到勅誥蒙恩授臣左神
武大將軍雅州刺史者竊以國家棄瑕用人含垢御
物毀廢之迹再賜甄收仰荷天恩罔知紀極伏念臣
往年知吉州日以父年老樂在鄉土曾乞解官侍養
適會朝廷恩命授臣分司外議雖若棄捐於臣實爲
私便官無曹事月有俸錢內奉旨甘聊亦溫足近者
就家增秩已出非望今茲再宣成命復綴通班待遇

至優豈宜辭讓臣又聞之前典事親之禮八十者一
子不從政九十者其家不從政蓋謂高年之家親屬
雖衆當留子男常在左右也切緣臣父年近八十臣
獨一弟翊已授惠州歸善縣主簿違去膝下惟臣旦
暮親侍膳羞今來旣授右職便湏遠赴邊任奉親而
往則有道路之勞委親而行又闕晨昏之養况今方
隅無警賢俊至多不乏一臣以濟衆務伏望聖慈察
臣誠請許臣且守舊官依前分司韶州居住所圖就
養少裨孝治之風干瀆冕旒無任惶懼待罪之至所
有遞到勅誥已牒送韶州聽候朝廷回降指揮繳納

第二狀

臣昨蒙恩除授左神武軍大將軍雅州刺史克壽州
兵馬鈐轄尋以父年老具狀奉聞乞守舊官依前分
司侍養今月十一日准中書劄子奉聖旨不許辭讓
者伏念臣昨以毀廢南歸因得侍親之便終身農畝
實所甘心忽蒙異恩再加錄用荷國家含養之德同
天地更生之仁仍蒙聖慈不許辭讓豈不知出身事
主之節受命忘家之忠圖後效可以滌前非履榮途
勝於處窮巷况君親之恩至厚而忠義之心弗忘但
緣父年衰老先患上氣每風露所觸則喘嗽尤甚迎
侍艱難有此不便遂至再披肝胆干冒朝廷乞依前
來所奏只守舊官依前分司侍養伏望聖恩特賜俞
允違拒詔命甘俟除削

謝轉衛尉卿表

臣某言十一月二十八日准進奏院遞到勅誥各一
道蒙恩授臣衛尉卿依前分司南京韶州居住散官
勲封賜如故者舉稀闕之典方治於隆平廣滲漉之
仁遽霑於枯瘁中謝竊以古之哲后皆建合宮體房
心布政之名行祖宗侑食之禮周同廟制蓋嚴配之
所先漢比郊儀故精禋之爲重汶上之圖太簡國南

之議未工允俟聖朝裁定彛矩伏惟皇帝陛下順稽古訓祇答靈心卽路寢之正居講總章之大摯百神胥悅歆至治之馨香萬國懽呼荷湛恩之汪濊如臣者孤危得罪擯廢累年豈期蓬華之遐均蒙雷雨之施睚眦之辭未塞何意叨榮支離之粟愈多敢忘圖報惟懷淵谷之懼更增斗極之瞻但臣無任云云

虔州謝上表

臣某言九月六日進奏院遞到勅牒一道蒙恩落分司南京守本官就差知虔州軍州事已於本月十日到任上訖仰望雲天起於久廢重霑雨露恩比再生

中謝

伏念臣出自寒微素無才識幸逢明主擢在近班本期名教之敦崇與正朝廷之黜陟不悟怨仇交構毀訾百端尚蒙洪覆之仁移隸別都之籍退居田里坐變炎涼前歲被以言綸授之勇爵宣君命而見召在臣義之必行蓋以弟任遠官父方臥病委之遐適心所難安尋瀝血誠再干天聽果回睿旨許遂家居免朝雖遠於宸廷奪祿不從於吏議享無名之厚奉久愧冗閑乘一障以先登亦惟驅策豈謂不離鄉寺就委郡章旣同死灰之復然俾展鈇刀之一割親有旨甘之便民當攘劫之餘得奉寬條庶成後效此

武溪集 卷十四 十一
蓋伏遇皇帝陛下堯天廣覆湯網宏開遺棄咸收幽
隱必察皇明下燭同日月之無私惠澤所需匪乾坤
而共泰永言朽瘁育以陽春特推簪履之舊恩無使
田園之虛老敢不佩服光寵罄竭疲駑詢疾苦之所
先遵簡易之成理不忘官守上報主知但臣無任
云

桂州謝上表

臣某言昨於六月二十日准樞密院遞到勅誥蒙恩
免持服特授守祕書監就差知潭州兼本路安撫使
并准中書劄子奉旨令臣次日起離乘遞馬赴發本

任仍令韶州催促進發不得收接辭免文狀及在路
再奉勅該差知桂州克廣南西路都鈐轄兼經畧安
撫使准中書劄子三道催促赴任臣尋於今月十六
日到任上訖事起金革辭避無從君父之恩感深以
泣申謝伏念臣生在遐徼才識無取自遭荼毒未盈
歲月近者儂蠻作梗嶺外騷然憫彼遠方如在重病
思與診療無有方術忽奉恩旨令守長沙非喜名爵
之所加自謂救兵之可出且古之列國尚發恤憐之
師况今爲王臣豈有坐觀之理由是徧檄境內分起
卒徒本約一月之中回至番禺城下朝命旣改人心

不同論議紛紜師已減半既違本志進退不遑職多
任重而可憂就近辭遠而非便勉趨新任自顧茫然
官兵盡集於東南狂寇豈忘於巢穴當資銳旅遏彼
歸途而封疆闊遠守禦虛寡未知何計可以逃責內
惟愚暗何堪差委此蓋伏遇皇帝陛下敦二儀之仁
回萬里之照特憐孤露誤記寸長擢自苦塊之中叅
於方面之寄敢不捐軀竭慮酬報皇恩伏乞赫震天
威剪滅醜類所以快四方之望懾百蠻之心臣之願
也候臣與楊旼處置廣西邊機了日却乞縑麻私室
終守喪制

乞解職行服狀

右臣去年六月二十日樞密院遽勅誥至韶州蒙恩
免持服特授秘書監就差知潭州兼本路安撫使仍
准中書劄子奉聖旨限次日起發不許辭免未到任
間再奉勅改差知桂州克廣南西路都鈐轄兼經略
安撫使於七月十六日到任又准中書劄子奉聖旨
同楊旼等經制廣南東西路盜賊事自授命已來蔣
偕等諸將敗衄臣亦累狀乞從追削歸守喪制至今
年正月十八日宣徽使狄青部領三將兵甲殺敗蠻
寇收復邕州賊首智高奔回巢穴狄某孫某石某等

各已發還京臣今分屯兵馬卽回本任伏念臣去歲授官不敢辭免者賊在方面逼近鄉里欲因驅策翦除兇醜而絕無勞效幸免追逐况今盜賊出境賢俊備朝何假墨綬以臨民政再念臣父存之日尚容歸侍父歿之後不能終喪乃是微臣事親之不誠朝廷置臣於有過臣若拂衣而先去則似要君抗章自陳蓋非虛飾伏乞朝廷憫臣持父之服有限報國之日尚長許臣解官歸鄉終滿喪制則臣感天荷聖之誠無有紀極

第二狀

右臣輒傾血誠頻瀆天聽退量輕易甘俟誅夷臣聞三年之喪雖貴遂服國朝敦尚孝理爲萬世法大臣遭父母喪者竝許解官終制去歲以蠻賊乘虛攻圍廣城於臣廬居最爲密邇朝廷令臣墨綬起臨戎事臣亦以爲朋友之急尚或赴之而况方面艱難豈當辭免由是自潭之桂東還于廣又西至于邕賓之郊驅馳忘倦雖以恩臨諸峒信結交趾旁絕賊援而專輒之過已多其如將怯兵惰挫衄之罪相繼今茲宣撫使狄青領兵殺獲寇黨收復邊城賊之殘徒遠遁外界兼安化蠻人已就招安邊境寧息臣已回歸本

任伏念臣所天隕逝方過暮祥終身之戚冒哀爲愧
昨在邕州已曾陳乞歸鄉持服終制今來除溪峒等
處敘述勞效但于兵甲公事不敢滯依舊行遣外所
有貴州文字臣更不簽書欲乞候錄叙效了當日不
候替人將經畧安撫司公事交與轉運使一面管勾
臣却回鄉里持服終滿喪制如此則朝廷任用臣下
存乎大體臣之進退亦得其分伏乞聖慈特賜俞允
况今熙隆之運英賢滿朝未至無人堪付一郡不可
使傷禮敗俗由臣而始臣無任

武溪集卷第十四

十月二十九日燈下校定

武溪集卷第十五目錄

表中

免轉給事中狀

免轉工部侍郎狀

謝轉給事中表

謝轉工部侍郎表

謝加勳封表

免克集賢學士表

謝克集賢學士表

免轉戶部侍郎狀

謝轉戶部侍郎表

潭州謝上表

青州謝上表

謝加護軍食邑表

免轉吏部侍郎狀

免轉尚書左承知廣州狀 并荅詔

再免知廣州表

廣州謝上表

謝加勲邑表

謝轉工部尚書表

武溪集卷十五目錄終

武溪集卷第十五

宋工部尚書克集賢院學士贈尚書左僕射累贈

少師謚襄公余靖著

表中

免轉給事中狀

右臣今月二十日進奏院遞到勅誥各一道授臣給

事中者竊以賞為國典必中事功寵溢情涯敢忘辭

避伏念臣揆材至薄賦命多奇幸偶休明免居羈賤

向以邊臣失備蠻寇內侵越從纒經之中起視金革

之事漫懷嫉惡素匪知兵所至面牆幾同學製賊鋒

尚銳勝算無施身負重而日增民在湖而同窘果煩
睿眷特掇樞臣狄青以人傑之雄總其師律孫沔以
國器之重濟以事機號令修明士馬奮勵故得克醜
敗亡而絕迹蒸黔蘇復以息肩青所以定二廣之阡
危沔所以正一方之經制臣則幸於免戾何止備員
今乃例被綸言同增官秩雖念勞勸善國家寧厚於
恩章而揣分量能私計實非於已力伏乞察臣誠請
追改命書則朝廷無濫賞之譏微臣免貪功之過干
冒冕旒臣無任待罪激切之至所有降到勅誥已送
桂州軍資庫收管聽候朝廷指揮繳納

免轉工部侍郎狀

右臣今月十三日三班差使殿侍韓某乘遞馬賫送
到中書劄子并勅誥各一道蒙恩授臣尚書工部侍
郎仍就賜銀二百兩者前恩未謝後寵復加內揆空
疎第深覲愧伏念臣出於寒族起自諸生素乏軼群
之材久罹負俗之謗昨以蠻酋叛渙嶺服震驚雖分
守土之權莫展擒克之策屬元戎之善勝加邇臣之
協謨因此安邊幸於免戾豈謂皇明遠照寵數荐臨
且方上讓章蓋慙非據而未承報旨更冒今榮揣已
力而實微干物議而爲甚用傾愚懇上瀆天聰願回

過恩庶存^全薄祐俾雷雨之澤無至妄施則草茅之姿免於深譴除就賜銀已受領外所有齋送到勅告不敢祇受乞行回納已牒桂州軍資庫收管聽候朝廷指揮伏望聖慈特賜俞允但臣無任

謝轉給事中表

臣某言昨於五月內進奏院遞到勅^告誥蒙恩授臣給事中依前知桂州克廣南西路都鈐轄經畧安撫使尋具狀辭讓准六月四日中書劄子勘會某已降勅命除授工部侍郎奉聖旨某所除恩命卽令祇受更不得陳讓者^{申謝}伏念臣才非應務識不逮人徒邁

光華得諧祿仕向以邊臣失備蠻孽侵疆眷言苦塊之居適在^{戈干}之地遽蒙朝命俾預兵謀道路之勤敢忘夙夜軍旅之任素昧韜鈴雖居戎馬之間蔑著涓塵之效幸賴聖宸成算樞輔專征因節制之有歸勵偏裨而同力兵鋒一集謀^注先擒群兇散亡庶民休息攻之必取蓋有元勲職在具僚過蒙厚賞內懷非據嘗叙至誠乞回濫恩庶全素志豈謂皇明下照寵渥荐加委之輯寧靡容辭避此蓋皇帝陛下如天廣覆與物無私譬春夏之和邇遐咸被比雷雨之施甘苦皆霑念孤臣之無庸與元戎而並命仍加敦諭

彌用憂兢敢不祇率政條舉寬民瘵庶於境域同此
樂康所有除工部侍郎勅誥告已別狀聞奏伏望聖慈
許令辭讓但臣無任云云

謝轉工部侍郎表

臣某言昨蒙恩旨差三班差使殿侍韓某賫送到勅
誥一道授臣工部侍郎尋具狀聞奏乞行回納准七
月五日中書省劄子奉聖旨所降恩命卽令祇受更
不許辭讓者申謝伏念臣生自寒鄉蚤逢明主知名
驟進嘗叨四戶之官負謗閑居猶紆三品之綬嚮還
苦次甫畢喪期屬嶺表之驚騷預軍興之驅策徒竭

前茅之慮蔑聞橫草之功所賴者廟堂講受於聖謨
斧鉞肅將於王怒獻戎之捷蓋主將之勲有成從驃
得侯於國家之恩大厚內愧冒塵於職任再乞追還
於詔書誠出誤知不容退讓此蓋皇帝陛下恢乾坤
之廣度垂日月之至明賞善勸能義存寧僭記功忘
過意切兼容致此非材屢增顯秩敢不恪遵寬詔欽
率彛章臥鼓滅烽上繫於聖化思艱圖易庶保於民
和臣無任云云

謝加勲封表

臣某言十二月二十六日進奏院遞到勅誥各一道告

蒙恩授臣依前守尚書工部侍郎加輕車都尉進封
始興郡開國侯食邑五百戶仍放朝謝者祀典之修
允合丕貺恩章之廣覃及具臣中謝恭以國家祚纂
堯基化恢禹服配天昭孝侑三聖以成儀麗澤均禧
浹四方而渙號伏念臣素微材術叨預藩宣方趨乘
障之勤莫廁侍祠之列豈期雷雨之施不遺管蒯之
微盟府何功遽勲官之見錫爵名加等仍鄉郡以兼
榮揣分逾涯省躬增惕敢不外寧邊隙內撫民封惟
堅犬馬之誠上荅乾坤之造臣無任云云

免克集賢學士表

臣某言今月二十一日進奏院遞到勅誥各一道蒙
恩授臣依前守尚書工部侍郎克集賢院學士依舊
知桂州并准樞密劄子中書樞密院同奉聖旨令臣
分析兒孫或近親骨肉一名聞奏者松楸之戀誠本
告歸雨露之恩事出非望撫躬懷惕聞命若驚中謝
伏念臣素乏藝文固無材武幸逢聖世早列仕途間
者起自廢居奄遭荼苦喪期未艾蠻事遽興首預詔
除敢忘宣力賴元戎之制勝致闔境以再安臣以非
材例增優秩亦嘗乞收印綬還襲縑麻狡寇尚存私
誠莫遂近以遠擒賊媼稍息邊虞願返鄉閭修營壠

墓而遽蒙恩旨加賜職名未伸上塚之誠已掇要君之過再念臣前歲與起居舍人楊畋閣門副使曹修同時受命經制賊盜畋等各懷忠蓋並練權謀當單車制禦之初值劇賊猖狂之際雖英韶處置偶失事機而連賀保全皆由指授今畋等舊官未復而臣屢承寵命揆茲進退之理彌深兢愧之懷乞回過恩庶伸微志臣今乞將所授集賢院學士及兒孫恩澤並各回納只乞特與楊畋曹修牽復舊官所貴上有念勞之恩臣無過分之責其有遞到勅誥已牒送桂州軍資庫收管聽候朝旨繳納伏乞聖慈特賜俞允

謝克集賢學士表

臣某言三月二十一日准進奏院遞到勅牒官誥各一道蒙恩授臣依前守尚書工部侍郎克集賢院學士依舊知桂州并准八月十一日中書劄子奉聖旨不許辭讓者封章上叩期遂於私誠宸旨下臨靡容於遜避申謝伏念臣命多奇隻噐本踈頑起草掖垣嘗因毀去懷章郡邸遽以喪歸向緣蠻落之內侵遂假獸符而外禦昔賢之赴公難有警則腰經以從權人子之報私恩已事則衣縗而返次敢再援於古義願追服於素冠遽沐天慈過矜樛散仍卽藩垣之寄

俾叅英俊之遊重念元帥成功附驥已叨於膺仕常僚失職拔茅未復於舊聯乞還過量之恩少遂推賢之志豈悟聖謨廣大國典寬明俯鑒無他之賜不加非言之罪特申前命俾踐華途此蓋伏遇皇帝陛下堯舜聰明乾坤覆燾春生秋殺不私雨露之濡尺短寸長必盡輪轅之用致茲蒙鄙屢玷寵光敢不祇率郡條樂宣吏職農桑舊俗咸俾於懷生荒曠外區悉期於稟朔冀稍禪於化體庶上荅於皇慈臣無任云免戶部侍郎狀

臣今月十四日進奏院遞到勅誥各一道蒙恩特授

臣戶部侍郎依前充集賢院學士候今任成資日仍令再任者聞命驚惶伏增隕越伏念臣才非應務智不逮人徒以虛名常叨近署須遭讒構甘在棄捐屬蠻事猝興起臣於喪次而兵勢未集謀虜意弗周力小任重日增憂惕及至歸仁之勝三軍凱旋破賊者乃臣青之勲勞撫民者皆臣汚之經制臣稟受節度謀無已出逮乎遠縛賊毋擒誅寇黨內則朝廷威令外則夷獠協同於臣愚拙何功之有昨聞轉運提刑司舉再任臣尋以心力衰耗不堪再任已具狀乞依舊分司於韶州居住庶得修營墳墓今來忽頒成命就

陟左曹恩渥至優實爲過分清秩厚俸誰不欲之事
既逾涯豈宜安處伏緣本路外接西廣六蕃南連交
趾九道沿邊溪洞一百餘州苟失撫綏立生患難非
臣衰朽負謫之人能堪久任所有降到勅誥不敢祇
受已牒送桂州軍資庫收管聽候朝廷指揮伏乞檢
臣前奏許令換一散秩依舊分司於韶州居住所有
邊任伏乞別擇材賢干瀆冕旒臣無任云云

謝轉戶部侍郎表

臣某言准都進奏院遞到勅誥各一道蒙恩授臣尚
書戶部侍郎依前充集賢院學士知桂州候今任成

資日仍令再任并准樞密院劄子奉聖旨依前降指
揮不許辭讓者邊亭擇帥願避於才能天紘宣忠靡
容於遜讓中謝伏念臣素亡學術濫竊時名屬蠻酋
之擾邊卽喪廬而受命雖懷急病之意而無弭難之
才名分一面之權實稟元戎之算歸仁之捷臣力何
施特磨之擒衆謀允濟以至羣克遠遁九譯難通天
假手於外夷寇得誅於大懟皆皇威之震疊致醜類
以殲夷幸免瘞官已慙尸祿豈謂曲成天獎就錫詔
函增秩而畱用漢朝之故事撫封以舊仍越嶺之攸
居無易教條俾安氓俗重念臣蚤緣積毀嘗隸別都

久遺鷓鴣之行頗樂田園之趣因茲過寵當思避賢
惟冀罷歸庶全冲退而乃再頒綸旨俾踐恩章顧反
汗以尤難但撫躬而增惕此蓋伏遇皇帝陛下天慈
廣覆乾體旁羅士濟濟而必臻術九九而無棄致是
草茅之質薦承雨露之恩謹當祇率政經增修戎畧
荒忽之外俾銷旅拒之謀瘡痍之餘期識中和之治
臣無任 云云

潭州謝上表

臣某言伏奉勅命就差知潭州軍州事充荆湖南路
安撫使已於今日二十三日到任上訖久居炎徼忽

荷天恩雖尚遠於闕庭幸無虞於瘴癘 申謝 伏念臣
素無學術徒偶休明宦路風波艱危備歷君恩雨露
涓滴未酬頃慮欒棘之哀尚踐朞祥之制屬溪蠻之
叛渙軼過戍以跳梁攻圍越臺侵迫庾嶠雖微臣修
完堡障本期自固於家林而朝廷奪去縑麻遽俾分
持於戎律懼薄材而敗事會元帥之成功假號渠魁
既遠迺於夷域主謀克媪俄就戮於天街蓋震疊於
皇威致糝寧於蠻落臣無纖芥之力徒居戎旅之間
職是累季空尸厚祿豈謂忽承冊詔還撫舊封再見
昔時之山川如全此生之首領此蓋伏遇皇帝陛下

天慈廣覆日照無私公聽竝觀用臣於衆毀必察之
際記功忘過知臣有臨危不避之誠每遇急難必蒙
驅策旣臻平定未忍棄捐重施造化之恩復委藩防
之寄謹當率循政體講守邦經封內之民或未康必
詢其疾隱境上之兵猶未戢亟議於綏懷圖報國恩
庶逭官責臣無任云云

青州謝上表

臣某言蒙恩就差知青州克京東東路安撫使放朝
辭疾速發赴本任已於今月二十五日到任上訖荆
湘南部未著善聲海岱名區再叨方任揆能至薄拜

命若驚申謝伏念臣出於寒微素無才業因緣盛典
忝竊通班向自喪廬起從邊寄名叨末將慙應變以
非長算稟元戎幸因人而成事畱撫凋瘵頗繇歲時
無復望於寵榮止願畢於婚嫁吳芮書忠之地尋獲
便安營丘賜履之封驟更委寄冒進誠知於尸祿懇
辭恐涉於要君恪奉宸恩聿臨所部况乎禹平九土
青有古名周建諸侯齊爲大國俗幾一變之道士有
四豪之風誠儒學之興居亦寇盜之時起宜求當世
之碩彥以舉列城之政綱豈意樗櫟之散材亦叨兵
馬之大郡此蓋伏遇皇帝陛下廣乾坤之覆載恢堯

舜之聰明不責纖芥之勞徒軫遺簪之舊矜其晚節
屢徙要藩謹當祇率國章詳求民瘼不矯激以沽譽
無慘刻以失中慕君子樂易之宜宣朝廷寬大之意
勉圖所被庶或有成臣無任云

謝加護軍食邑表

臣某言本月九日准都進奏院遞到勅牒官誥一道
授臣依前守尚書戶部侍郎克集賢院學士加護軍
食邑五百戶散官封食實封賜如故仍放朝謝者歲
事闕宮講行闊典均禧函夏敷及具僚申謝恭惟皇
帝陛下揔握蘿圖統承熙運謹蹈蒸蒸之孝寅守丕

丕之基豐潔粢盛內盡享親之志序陳昭穆躬修合
祭之儀既成瓘鬯之盛容廣布蓼蕭之渥澤下周朝
韞普錫言綸臣素乏時材濫叨藩寄駿奔述職阻捧
於籩豆渙汗推恩竝陞於勲爵居慙德詔行畏食浮
自天之命難違踏地之憂愈積誓堅死節上荅鴻慈
但臣無任云

免轉吏部侍郎狀

今月十七日准進奏院遞到勅誥二道授臣吏部侍
郎依前克集賢院學士散官差遣勲封食實封賜如
故者竊以國家列布衆職用待羣材至如文昌之居

應三垣之上象天官之重貳六府之首卿當於國器以揀求豈宜年勞而叙進伏念臣智謀甚短名德素輕久冒朝恩屢膺州任嘗思引退式冀保全儻綸綍之濫加必負乘而益過願回誤寵庶遂初心所有降到勅誥欲乞繳納中書已牒送青州收管訖

免轉尚書左丞知廣州狀

并荅詔

右臣准閣門告報蒙恩授臣尚書左丞依前集賢院學士知廣州充廣南東路都鈐轄經畧安撫使替魏琰者伏念臣昨於慶曆中自知制誥分司南京於韶州居住是時蠻賊唐和走在嶺表已有臣僚言臣得

罪不合令居嶺南尚賴聖朝含容免臣遷徙至皇祐中蠻賊儂智高俶擾二廣臣於父憂中首被詔命起知潭州移知桂州充廣南西路經畧安撫使卽與交趾公牒往來尋在狄青陣中戰敗蠻賊收復邕州俄又捉獲儂智高毋屢蒙聖恩遷官屢會陳乞依舊分司不蒙俞允去歲甲峒作過准中書劄子自青州召臣差充廣南西路體量安撫使面奉聖旨許令牒報交趾差官前來商量及至差費嘉祐等到欽州猶差人前來體探是與不是臣親身仍言臣與先生有分今來差臣知廣州緣廣州與交趾海道相通切慮談

者易生構間若言臣交通外夷則於臣家族不便兼
廣州大市居民元無城池圍捍近歲議者多欲修築
羅城若從羣議必須大興力役以民力凋弊之後加
臣才術短淺當此重寄必致曠敗臣今欲乞只守舊
官差知荆南潭州一次庶免愆謗干冒冕旒無任待
罪惶恐之至伏望聖慈特賜俞允

荅詔

勅余某省所奏准閣門告報蒙恩授臣尚書左丞依
前集賢院學士知廣州充廣南東路都鈐轄經畧安
撫使臣才術短淺當此重寄必致曠敗欲乞只守舊

官差知荆南潭州一次事具悉聞者過吏無狀視盜
不謹致茲蠻蜚擾我嶺嶠番禺之地嘗罹寇患凋弊
迄今傷夷未復牧守之任推擇惟難以卿策慮無遺
忠義有素文理足以綏衆武備足以折衝進居丞轄
之重付畀方面之寄必能宣明威信朕庶幾無南顧
之憂矣而卿何嫌何疑復多讓焉是彰朕之不明而
無以知賢也當體至意往服厥官所乞宜不允故茲
詔示想宜知悉

再免知廣州表

臣某言准今月十七日詔書以臣蒙恩授尚書左丞

依前集賢院學士知廣州臣才術短淺當此重寄必致曠敗欲乞只守舊官差知荆南潭州一次所乞宜不允者外朝疎遠固囿於官儀中詔丁寧遽頒於天語推聖恩之過厚在臣分以何安內愧空疎理當辭避中謝伏念臣才非應務智乏周身謫毀易成風波可畏頃者薦修鄰好三使虜庭始由歡聘以通情終於習熟而爲罪一時儂蠻干紀幕府專征蕩寇黨則元帥之謀擒魁媼則羣夷之力曾無涓効屢玷勲書去歲峒蠻憑陵官軍沮折詔臣喻指事止綏邇况是單車之戒行已蒙叙進豈可彤墀之復命再忝陞資

切緣嶺海之遙藩垣之重若方隅之有警則退讓以無名當今時在弭兵理非避事就近而不就遠雖曰便安辭易而不辭難敢期煩瀆且又越臺之境胡賈雜居古者城無外壩當由土之疎惡謀於修築迨及旬季計其徒庸難乎速就惜民力則謂之弛備徇衆議則困於勞人玩寇之謗若興覆族之誅可懼矧以地聯鄉曲勢有嫌疑儻回渙汗之恩實荷保全之賜臣情願不就轉官恩澤乞只守舊官差知荆潭一郡謹奉表陳乞以聞伏望聖慈特賜俞允干冒旒袞但臣無任云云

廣州謝上表

臣某言奉勅差知廣州軍州事兼管內勸農市舶使
提點銀銅場公事充廣南東路都鈐轄兼本路經畧
安撫使已於今月十八日到任上訖斗筲器小方面
任隆海國雖遐聖恩尤厚中謝伏念臣稟生卑薄賦
性顛愚誤蒙當宁之知殊乏防閑之慮三聘未羈之
虜終以左遷一彈不孝之人遭其返噬既不虞而致
毀固無望於復燃就喪次以家居屬儂蠻之寇境愚
謂古之卿士退處鄉閭或遇凶荒之期賊盜爲梗則
必同堅堡壁用庇族姻謀與守臣共伸此議朝廷因

其急病誤謂知兵起於練經之中委其金革之事以
至絕交夷唇齒之援擒寇魁子母之親正軍刑於藁
街愴國威於銅柱在見聞之或異亦讒誣之互興上
賴天慈屢戛藩寄去歲邕邊失策納彼逋逃峒獠恃
強遂成侵擾邏司喪元而潰敗列郡聞風而震驚因
驛騎以召臣俾單車而諭指雖島夷聽命願誅首惡
之人而寨將貪功未絕交爭之患亦旣與之約束各
守封疆苟邦令之必行諒吾圉之能固猶以嶺服之
外越徼相通俾臨此州以辦邊事竊惟兵火之後瘡
痍未平力役尚繁生業猶困將所存恤當擇循良再

具表陳奠回恩旨此蓋伏遇皇帝陛下乾剛下濟離
照旁羅儻寸有所長則使之必報輪翮無遺於木鴈
潢汙或薦於王公致此非才亦叨重任敢不率勵愚
慮勉守孤忠察蕃漢險易之情宜陛下憂勤之意庶
乎萌隸同被休明臣無任

云云

謝加勲邑表

臣某言今月二十七日進奏院遞到勅牒官誥各一
道伏蒙聖恩授臣依前守尚書左丞克集賢院學士
加上護軍進封開國公食邑五百戶散官實封賜如
故者合宮禮成絲區澤普不遺遐遠咸被冲融申謝

恭惟皇帝陛下昭事上穹丕承洪緒徧舉累朝之潤
典再修宗祀之盛儀卽露寢以達誠御端闈而渙號
旁周覆載罔不懽呼下逮縉紳咸加命數臣器能無
取禮秩兼優獲諸將以書勲冠五等而疏爵仍增祿
食備極寵靈敢不荷生育之恩勤簡惠之政誓全苦
節上荅宸慈但臣阻守外藩不獲奔詣闕庭臣無任

云云

謝轉工部尚書表

臣某言今月十九日進奏院遞到勅誥各一道伏蒙
聖恩授臣工部尚書依前充集賢院學士加柱國食

武溪集 卷十五
邑五百戶散官實封賜如故者龍德飛天蘿圖興運
曠蕩之澤遐遠不遺申謝伏念臣學謝兼明器慙遠
到黃緣孤進遭遇先朝亟登詞翰之科頗居文史之
任遽繇諫路擢掌王言常欲北屈匈奴南羈勁越未
能勝任每預遣行會無橫草之功連被拔茅之寵屢
委臨於戎律久陪貳於文昌此蓋伏遇皇帝陛下嗣
守丕基渙發大號乾坤之造海嶽至大而必包雷雨
之恩動植無微而不及至茲散拙亦預甄陞素乏羽
儀之才遽當喉舌之任將何以根本萬事出納五言
謹當祇畏簡書恪修條教更勵委珠之節不忘曳履

之忠庶答天慈以逃官謗但臣守遠藩鎮不獲奔詣

闕庭臣無任云云

武溪集卷第十五 十月二十九日授畢夜漏三下矣

武溪集卷第十六目錄

表下

謝續支請受表

乞不請支賜添支狀

乞不請中冬翠錦衣襖狀

回納詔賜冬服狀

謝賜絹狀

謝賜銀狀

代富樞密辭職表

代狄宣撫賀捷表

進平蠻記表

賀生擒儂智高母表

賀誅儂智高母表

賀曲赦表

賀德音表

賀南郊赦表

賀裕享赦表

謝恤刑表

謝賜曆日表

謝傳宣撫問表

謝傳宣撫問表

慰溫成皇后張氏薨表

武溪集卷第十六

宋工部尚書充集賢院學士贈尚書左僕射累贈

少師諡襄公余靖著

表下

謝續支請受表

臣某言今月十六日准中書劄子奉聖旨依前守光祿少卿分司南京許於韶州居住令三司接續支與請受者有命自天再霑於幽隱無功受祿但益於戰兢申謝伏念臣素乏器能生在遐徼幸逢聖代登歷仕階夫何闇淺之材常居文雅之選屢蒙驅策罔避

險夷頃因專對之勤擢在邇臣之列深虞福過尋已
謗生仇人之訴得行逐客之書難上退歸田里坐易
歲時甘海嶠以陸沉沐天慈之再造起于謫籍付以
伍符上荷君恩固無宜於堅讓適當父病難捨之而
遠行重瀝血誠果從私便吏議俾停於月廩家居尤
畏於簡書本冀承顏之歡幾成餽口之患遽蒙宸眷
荐錫綸言雖容彭澤之歸仍續鄭均之祿此蓋伏遇
皇帝陛下堯心廣愛乾體無私明比日升極大荒而
普照恩同春燠慮一物之偏枯雖居江海之遙時霑
雨露之澤當圖死報難以言宣臣無任云云

乞不請支賜添支狀

右臣昨奉勅免持服特授秘書監就差知潭州兼本
路安撫使准中書劄子奉聖旨令韶州特支賜錢三
百貫文尋赴任次在路奉勅改差知桂州廣南西路
都鈐轄兼經略安撫使已於七月十六日到任上訖
伏緣臣昨者起就潭州差遣所以不敢辭免者蓋欲
因朝廷之命起湖南兵甲往廣州策應尋奉勅命改
差其任益重非臣本志所貪權寵臣今只候楊叟到
西路商量邊機了日却乞終喪持服兼臣居喪中已
奉聖旨支給前官料錢所有特支賜錢見寄韶州軍

資庫并桂州合請添支錢物並乞不請領其原受中書劄子一道謹具封納

乞不請中冬翠錦衣襖狀

右臣准桂州牒差人送到勅書一道蒙恩賜臣翠毛細錦錦旋襪一領者伏念臣自遭荼蓼甫及暮祥屬蠻獠之猖狂廢几筵之號慕未成軍伐屢照天慈且枕塊寢苦禮雖可奪而食稻衣錦心所難安况欒棘之在容顧曳裾而非稱願收渙汗以遂素心已牒桂州更不差人赴京請領所有賜到勅書一道謹具狀封納

回納詔賜冬服狀

臣今月十四日進奏院遞到勅書一道蒙恩賜臣簇四雕兒細錦旋襪等冬服者祇荷寵光不任感懼伏念臣向遭荼毒歸守丘樊遽屬軍興遂離喪次光陰過隙祥禪未周墨纒絰以臨戎蓋先國事褻衣裳而盡飾難處人情願回渥恩庶全素志所有前件細錦冬服乞不請領

謝賜絹狀

右臣今月六日伏蒙聖恩差御藥梁惟一賜臣絹二百匹令臣迎親歸京者伏念臣本遠人素無通識誤

膺擢用莫補休明昨求外官蓋欲便於溫清過蒙聖造不令遠去闕庭未知所報之恩更承非望之賜上荷雲天之施下爲鄉里之光誓捐微軀以答洪覆

謝賜銀狀

右臣今月十三日三班差使殿侍韓喜乘遞馬齎送到中書劄子并勅誥各一道蒙恩授臣尚書工部侍郎仍就賜銀二百兩者伏緣殺蕩蠻寇收復邕州並是宣撫使狄青專總節制及孫沔石全彬等經畫臣雖同在陣中功非已出併蒙恩寵實不遑安除就賜銀二百兩已受領外有齎送到勅誥不敢祇受乞行回納已牒送桂州軍資庫收管聽候朝廷指揮及具狀附遞聞奏去訖

代富樞密辭職表

臣聞君命如天不可違拒臣心所守亦當敷陳臣稟性至愚立朝日淺素無材略上禪聖明去歲匈奴恃強侮慢中國故作瑕隙形於簡書臣蒙誤知專遣報聘奉陛下之成筭尋先朝之舊盟然而歲增貨財以噉豺虎國力益屈戎心益驕臣復何顏敘爲勞効此者陛下推不次之寵擢臣樞近臣豈不知佐時成務致君之遠圖逃賞避榮立身之小節其如臣之所守

非節而已蓋義有所處理自未安必若長轡遠馭招懷四夷致其酋長稽首北闕此而爲功可也今益以膏血肥其爪牙犬羊無厭出其本性一旦衝突何能保之恃此爲功臣所不敢伏願陛下精擢賢俊百度修舉臣雖不賞固將安心若因暫安之勢便謂無窮之福賞雖可冒禍亦何逃臣之此誠不欺神理儻或歲月敘遷國朝舊制臣非木石豈能無心亦非苟徇虛名避此殊寵伏惟陛下察臣誠實特賜俞允

代狄宣撫賀捷表

臣某言正月十八日至邕州歸仁舖蠻賊儂智高徒

黨出城迎戰登時殺獲首領黃師必等二千餘人當

夜儂智高焚城將帶殘徒潛遁尋差兵甲及溪峒壯

丁襲逐今月某日已出省地界者萬里奉詞蓋肅將

於天討羣蠻一戰遂收復於邊城中勳竊以國家威

疊四方恩涵八表日月所照悉解辯而來庭舟車所

通率輦費而修貢蠢爾廣源之部族本惟交趾之附

庸自肆陸梁招納亡叛乘邊陲之失備興戈甲以內

侵焚蕩州間鈔劫生聚遠浮江鬱直抵番禺自嶺而

南忘戰茲久忽逢衝突無不驚駭亦嘗屢遣師徒分

命將帥軍無部伍人不齊同勇者邀功而鮮謀怯者

貪生而先退賊既未經挫衄愈恣猖狂臣忝預諮詢日親機宜有覩茲醜類能不疚心久煩旰食之憂敢怠請行之志果蒙睿眷見許愚忠授成筭以卽途加寵名而異數常慮虛叨邊寄不副主知况彼竊據城池圖爲巢穴守於九地之下未易進攻御以七擒之奇固無良策而乃敢率犬羊之衆前當貔虎之師意拒轍而甚驕勢破竹而先解橫尸滿野委甲如山旣觸網以計窮遂焚營而宵遁係纍者逸老幼得以再生煨燼所餘金帛積而無筭再獲金城之固幾還銅柱之封非臣短材能集茲事此蓋皇帝陛下宸機電發

睿畧天成事達其情體漢光之遠照師行以律賜魏武之新書故此克強遽然破碎撫其彫瘵浸惠澤於民心殲彼狡頑振天聲於方外臣無任云云

進平蠻記表

臣某言古者興師命將征討四方必有開府之賓參聞策略所以廟堂成筭帷幄密謀擒縱之奇俘馘之實以撰述備史氏之採摭焉故竇憲燕然之勲陳湯郅支之捷震疊天聲與大漢傳於無窮者用此術也伏惟皇帝陛下龍德天飛三十餘載塞外無未羈之虜域中無不順之臣以北胡之疆盛而締於歡盟以

西夏之陸梁而終於屈伏夫何小醜敢干天誅彼儂
智高者蠢爾溪蠻生自凶族稔知邊鄙之無備廣招
亡叛以協謀直趨番禺圖據邕管燔毀者十二郡殺
掠者數萬人南方繹騷殆且半歲陛下出於睿筭特
命樞臣董統虎貔奉辭討逆金鼓一震羣兇席卷此
蓋皇威奮揚軍政整肅人思用命使之然也殿中丞
馮炳奉詔掌管機宜備見師行始末自智高舉事以
致敗亡凡朝廷處置軍前號令及賊之勝負一能編
之詞無虛美事皆實錄以臣共在行陣遂抄副本見
寄臣嘗忝史官見今之撰日曆者常執簡於數年之

後至乃搜尋檢訪罕能完備今馮炳於已事之際編
緝事實一無遺墜竊以方叔南征列在詩雅充國西
伐敘於史贊非獨顯勲臣之績用于以播國家之休
烈其馮炳撰平蠻記二卷已依本繕寫并臣去年准
宣撫使劄子准樞密院劄子奉聖旨殺到蠻賊尸首
築爲京觀仍立石其上鐫記年月及殺獲人數臣尋
撰成京觀記刻石立于邕州歸仁舖蠻塚之側又於
桂州北門之外就崖石磨刻出師平賊受筭凱旋年
月以宣示皇朝威令用肅遠方今併此碑文別爲一
卷同馮炳所撰記共成三卷謹隨表進呈伏乞宣付

史館

賀生擒儂智高母表

臣某言十月二十四日於大理國符磨道生擒到蠻持賊儂智高母偽稱太后阿儂并弟儂智光男儂繼宗儂繼封等尋差管押於今月初五日起離邕州赴闕去訖皇化遠覃通九譯而無外天誅所及雖萬里而必擒申賀伏以國家三聖開基千歲接統鬼區請吏海表同文嗟彼蠢蠻產茲悍婦會于凶族濟以奸謀篡父黨以假權屠子婿而兼土自開邑部靡識君師習為豺狼遂生蛇豕去附庸之舊壤并傍近之小區

侵軼省封偷延歲律邊臣罔上不以實聞寇孽野心因之內侮以至燔毀郡縣繫虜吏民東剽番禺北窺桂象屢徼王命圖據邊關所賴者睿筭受成樞臣總律犬羊之衆迎刃而亡禽鳥之驚棄巢而遁永言夷域絕異華風毒霧鬱而上蒸銳旅艱於深入假辯士之緩頰誘羣蠻而協心峒民授甲以赴期寇黨倒戈而自請衆謀為集元惡就擒猶託井蛙而自尊豈知天網之難漏本根既舉枝葉必從眷是炎荒漸紆邊患此蓋皇帝陛下堯仁天覆漢詔春融恢皇策而俗既大同疊天威而遠無不譙故得九夷之外聞恩信

以咸來一惡所歸在逃遁而靡隱罔遺寸鏃遂獲渠
魁再清銅柱之郊庸正藁街之戮亮惟朝著同宇震權
聲臣伏限守任邊州不獲朴蹈闕庭臣無任云云

賀誅儂智高母表

臣某言據本州進奏官申蠻賊儂智高等大理國已
斬除訖奉聖旨阿儂腰斬儂智光儂繼宗繼封各處
斬訖者卉服之蠻敢干國紀藁街之戮用正天誅申
賀臣伏以國家道貫百王德涵萬寓東漸西被邈踰
堯禹之封北洽南翔迥溢漢唐之域蠢茲凶族素隸
侯藩嘗竊地以逃來因拒關而弗納爾乃贅居邊境

盜弄兵鋒驅掠吏民燔劫郡縣久安之俗聞寇則驚
守長棄城而悉奔士卒投戈而自潰乘此釋騷之勢
肆行僭擬之名母號感星年稱啓曆蹂踐者十二郡
屠害者數萬人還據金湯圖為窟宅繇是睿謀獨斷
樞輔專征廟堂之筭有成步騎之師齊進爪牙雖衆
當一戰以皆摧巢穴既傾棄六親而莫保寓所生於
假父之國投孤族於遠夷之君過為巧詐之詞自作
偷生之計殊不知天下共惡神理弗容蠻貊雖遙恩
信可結元克支黨先從原野之誅頑媪孽童卒伏市
朝之法國章明備式昭雷電之威天網恢疎難漏鯨

面溪集 卷十六
鯁之戮四方共快萬口同詞臣伏限遠守郡條不獲
蹈舞闕庭臣無任云

賀曲赦表

臣某言今月初一日馬遍赦書一道至安撫司以殺
獲蠻寇收復邕州曲赦廣南東西路者登時同官吏
集衆宣示軍民依例施行訖狂蠻竊發遽騷嶺海之
邦庶彙重蘇遠霑雷雨之澤申賀伏以國家接千歲
之統擁百神之休一六合而同風重九譯而修贄蠢
然獠族素附交城父爲戮而不悛母同惡而增酷廣
招亡叛庸濟狡兇窺邊隙以漸深極兵鋒而爲暴遠

趨南海戈鋌肆掠於越郊還據兩江文檄徧邀於黃
洞妄祈枝附潛覬土疆赫王怒以遣師輟樞臣而總
律顧茲烏合未測天亡初居井以自深俄當轍而來
拒犬羊雖衆聿成膏斧之誅羽翼先摧遂起焚巢之
計旣已驅除醜類恢斥邊關捷布繼聞德音遽霑念
深黎庶罹此憫凶特推恢大之恩仍協發生之候此
蓋皇帝陛下乾剛下濟天惠周施澤兼被於存亡民
用忘於疲瘵拯其焚溺匝南夏而永康育以慈和與
萬方而同泰臣無任云

賀德音表

臣某言准尚書刑部牒准皇祐六年三月十七日德音改皇祐六年爲至和元年應四京及諸道州府軍監縣等見禁罪人限德音到日死罪降從流流罪已下並放當時集州官吏軍民宣示施行訖先天布令以召四時之和罪已興言特引萬方之過邦刑是恤聖德惟新申賀竊以日月之行罔違常數天人之應必感至誠永言合朔之期或偶二交之次遂成虧薄著驗經纏崇社責陰春秋之故事避寢修政帝王之舊規恭惟皇帝陛下道迪大中志深寅畏因三辰之示變詔六職以修方特推汪濊之恩躬行消復之要

渙紀元之大號期敷祐於羣生更也之明兆民共仰霈然之澤函夏同懽臣伏限守職邊郡不獲林蹈闕

庭臣無任

云云

賀南郊赦表

臣某言今月十六日馬通赦書一道至邕州以十一月四日南郊禮畢大赦天下者當時集本州官吏軍民等對衆宣示依例施行訖昭事上帝式遵大報之儀敷錫庶民庸洽來同之福申賀恭惟皇帝陛下接千歲之統逆三神之釐震威九區化覃萬寓偃閑師節宣暢淳風年穀屢豐瑞典不絕玉幣涓潔虔事天

之誠壇廟肅祇兼嚮親之孝膺天地之貺故二儀合
 祭而有嚴承祖宗之休故三聖偕侑而為始禮交樂
 具物遂時康均此純禧霈然諸夏神明來格求福不
 回瑕穢蕩清與民更始至於斥去告訐裁減賦租誠
 誅求之官釋逋負之債斯皆講盛德之事隆太平之
 基九有歡呼萬邦同泰臣伏限守職邊郡不獲抃蹈
 闕庭臣無任云云

賀裕享赦表

臣某言今月十六日准樞密院遞到裕享禮畢大赦
 一道當時集官吏軍民宣示施行訖宗祊誌祀講重

典以親行雷雨湛恩匝縣區而普及軍民竦踊中外
 歡呼申賀伏以國家祚稟赤精運興累聖藝祖題期
 而立極神宗奕葉以承休迨文考之握樞至太平而
 輯化並垂千古之餘烈此皆百世而不祧恭惟皇帝
 陛下祇遵先猷大寧諸夏固嘗備潔牲玉奉見郊丘
 啓八陛之壇答二儀之貺侑三聖于上帝耐羣后於
 闕宮親藉田之耕配明堂之享惟茲合食之盛祭久
 委有司之攝行舉是闕儀允為大典辨昭穆之序正
 乎東向之尊均賑膳之禧表乎祀事之重漢詔寬大
 齊民樂康減賦罷征乃人心之至願恤災宥過實王

政之所先垂髻盡識於昇平戴白同懷於悅豫臣無
任云云

謝恤刑表

四序均和聿屆蘊隆之候萬邦在宥爰推欽恤之仁
申謝切念臣本乏吏能謬當州寄屬傷夷之乍起復
忠愛之未孚粵此撫封寧無滯訟涉茲煩溲或窘狴
牢上軫宸聰俯憐遐俗譬諸籠檻開以罟羅特示哀
矜之懷庸頒寬大之詔敢不恪遵漢制祇凜堯言獄
未逮於簡孚情靡忘於伏念庶俾繫纆之苦無嗟暑
暘之傷恢布聖恩遠周邦域

謝賜曆日表

恭以國家政通三統德輯羣元應淳耀以題期罄幅
員而受朔臣濫階儒學猥領郡條因史官推策之勤
見聖人先天之用奉本朝治象之法式謹王正示庶
民啓塞之時俾知帝力臣無任云云

謝傳宣撫問表

臣某言今月初九日入內內侍省內侍殿頭張昭壽
到昭州蒙恩傳宣撫問者申謝伏以國家恩涵四海
威疊八荒蠢茲徼外之狂蠻素號日南之小族自焚
廬帳深入封疆未卽誅夷上煩宵旰臣才非通濟命

本羈孤誤分方面之憂適在傷殘之後道路之勤雖至犬羊之戮尚稽方懼國章遽傳天語王人之重來自日邊口勅初聆如親帝所愧乏前茅之慮或深挾續之恩敢不誨諭師徒敷陳逆順共勵在和之節庶成破賊之功無使腥羶得還巢穴上依睿筭期振天聲無任云

謝傳宣撫問表

臣某言今月二日入內內侍省內侍殿頭高居簡到州伏蒙聖恩傳宣撫問者今自日邊遠頒於休命語傳天上如對於清光揣已甚微荷恩至厚中謝恭惟

皇帝陛下丕承景運祇配嚴禋內盡志於祖宗畢薦誠於嶽瀆臣忝分朝寄適在海邦光華之使斯來郁穆之言遽及鞠躬聽命初同楚續之溫闔郡改觀共識堯雲之澤臣無任云

慰溫成皇后張氏薨表

臣某言進奏院正月八日追冊溫成皇后張氏薨謝者函夏之廣聞訃咸驚異竄伏以溫成皇后德稟儒門化恢嬪則動守珩璜之節退思圖史之規穆木稱賢協隆陰教藏舟茹嘆遽掩春華恭惟皇帝陛下特軫宸慈俯追遺懿禮崇三翟增象服以伸懷慘動六

官引鸞輅而知愴臣無任云云

武溪集卷第十六終十一月朔

武溪集卷第十七目錄

啓

謝帖職啓

謝知英州狀

謝知制誥啓

謝知制誥啓

謝外任
并兩制

謝知吉州啓

謝充集賢院學士啓

謝再任桂州啓

謝知潭州啓

謝知青州啓

謝知廣州啓

謝轉工部尚書啓

答淮南轉運段學士啓

回兩浙轉運葉學士啓

回狀元宋內翰啓

回賀吳內翰啓

賀梁相公啓

回賀孫學士啓

武溪集卷第十七

宋工部尚書充集賢院學士贈尚書左僕射累贈

少師諡襄公余靖著

啓

謝帖職啓

右某啓伏奉勅命蒙恩充前件職者天獎曲成寵典過厚內省鄙薄榮懼交至伏念某本惟庸淺生在遐陬弱歲就學則經無師範長年力行而才非老成常措躬而自知加鑽勵而忘倦且以有道之士樵夫笑其輒諧安平之時君子耻乎貧賤期慷慨以有立乃

徒步而西游屬皇德休明崇尚儒術廣求俊秀延及幽陋謹鄉遂之舉旅登仕途擇羣萃之材首膺嘉命越在官次固亡治聲徒稽吏資屢進榮秩間者以遷固舊學貫穿博乎羣書范謝所錄撰述推其良史向在先代摹于上庠雖千金置市淮南莫之能改而五經在鬻盧生得以裁定咨于前訓釋以所聞歸赴未央之朝雜上公車之奏敢期電矚擇用狂言不遺一介之善以廣同文之化石渠平議總以鉅儒中秘舊藏採其通說再易歲月僅終緝綴紕繆畢去固周於叅檢蠹文未辦猶示於傳疑重紆縶几之觀頗愧雲

臺之議豈謂薦言屢至睿澤猥加錄其微勤升之華貴伏惟昭文僕射相公秉惠和之德輔欽明之君宣百丑未舉之政扶萬世不傾之業裁成庶務明昭百辟薪樞克充于用白黑不逃其形而况承明之庭漢儒列於侍從東壁之府唐制專乎刊修所宜推擇俊髦收集英乂博求濟理之具以永無窮之聞必若望實外著器識兼遠屬詞典瞻知禮樂而能述立行端方敦名教而爲樂苟中茲選則惟其人夫何鯁生玷是榮命儻以稽合同異釐正舛忤此而可褒謂之必稱則蔡邕璧池之本鐫刻以爲勞鄭默蘭臺之經嘉

歎而尤著未聞前世推以厚恩揆茲非次之榮迥出
 常均之外蓋繇熙寧在運明哲主謀譬陽春之和土
 靡境埒大明之照物無幽隱用致鑛頑亦被光渥敢
 不勤服素履祇率攸聞黃卷之中稍研治體一官之
 守無隳國經庶答已知以逃羣謗其無任云云

謝知英州狀

右某伏奉聖恩授前件差遣者祇荷寵光不任感懼
 伏念某才非出類智不適時始懷鉛而備官遽越俎
 而蒙罪三遷歲曆再食闕庭明正既無狀以昭明固甘心
 於弃逐豈謂自天灑澤解網均恩眷言喬木之鄰邦

付以小侯之全壤光生里閭便為竹馬之期榮被親
 聞仍遂蘭陔之便此蓋某官素垂收拭倣棫力掩瑕疵致
 此顯愚復沾甄錄敢不勵精士檢祇率郡條上答天
 慈旁酬恩造

謝知制誥啓

伏蒙恩制授依前官知制誥知諫院者天獎發中星
 垣要切祇膺寵命以榮為憂竊以國家設正諫之官
 上叅國論開內史之府述宣王言所以烝進英髦克
 備扁闥乃能規益謀慮申布詞令鼓動萬物渙汗四
 方故非輕才所可兼任如某者稟生奇隻賦性蔽蒙

乏通識以濟時無獨行而高俗早違農畔遠託師模
才不稱於里閭譽不宣於庠塾伏自皇明繼照側陋
旁求一與計偕卽遷官簿甘心州縣之役絕望英俊
之游尋以庚午詔書恢復科試網羅數路寤寐衆才
名在選曹特殊制目天人三道之要毋得敷陳甲乙
千題之問僅能酌對進丞匠署出縮縣章學政未工
幸逃官謗嘗刊史簡之誤入聯書殿之華一忤貴權
遽逢譴逐雖聖恩寬惻追還近甸而私庭奉養乞泣
遠蕃初階守土之榮已報終堂之痛七更歲律再見
闕庭垂紳抱槩克還舊物文昌典祠之重奉嘗贊禮

之勤庀于攸司罔敢尸曠屬台臣退老聖政惟新總
攬乾綱思廣言路豈期疎闇亦蒙延獎進無當世骨
體之論下愧蕩蕙退闕侍親晨夕之養外慙烏鳥誠
雖許國義切所天累上封章願假麾守宸慈下照恩
賚曲霑俾迎親輿就居京轂徒增忝冒無補休明未
伸執簡之勞遽進代言之秩天居近密法太紫之崇
國命宣行當出總之重寧容底滯玷此選掄此蓋相
公樂育敦懷緝熙底績權衡不撓陶冶無私先爲萬
乘之容不棄一才之用謹當砥勵名節祇率忠規貴
賤不易其心險易不更其守勵蹇蹇之節啓寤天聰

演深厚之辭少裨政體過此以往未知所裁

謝知制誥啓

謝外任
并兩制

蒙恩授前件官并差遣者伏念某稟生奇隻賦性蔽蒙乏通識以濟時無過行而高俗嘗刊史簡之誤入聯書殿之華一忤貴權遽逢譴逐七更歲律再見闕庭趨茅蕝之通班帖若籤之舊職引裾伏諫無蹇正之風簪筆記言寡良直之譽遽蒙天獎進補掖垣累辭避而莫從顧忝竊而尤甚此蓋某官因雲洒潤伐木求聲素敦推致之誠用集亨嘉之會惟上圖於報效庶無負於朋游過此以還罔知所措

謝知吉州啓

右某啓伏奉勅命差知吉州軍州事已於八月四日到州赴上訖伏念某起自寒官官本無遠圖偶逢聖明遂玷清近論人君之得失正史氏之褒貶典西掖之綸綍領中臺之衡鑑寵任皆過毫髮無裨伏見行人之官列辟所選御君命以申信歌皇華而戒途四方式瞻專對爲重且以朝廷之大髦彥比肩至如識周古今言窮治亂蘊厚重之器抱通博之才可以出鋒穎於囊中暢威聲於方外者濟濟盈庭不可勝數而猥辱僉議獨當重委不能死請以堅避讓之誠偶得

生還果貽狙習之患原其所坐當伏嚴刑尚蒙寬恩
俾領便郡此蓋伏遇昭文相公燮調元化開濟萬邦
思九德之咸事慮一物之失所特形敷奏見軫孤危
過彈射溢惡之詞敦國家馭吏之體止從薄謫庸示
深仁風波垂拯於畏途日月遂回於曲照再蘇朽瘁
敢忘厚恩然念方今甲兵漸息賦歛必省謹當奉朝
廷寬大之詔求古人簡易之理削去苛橫勤詢疾苦
庶竭駑蹇少答恩私往此以還罔知所措

謝充集賢院學士啓

伏奉恩守本官充前件職不許辭讓者吏能非稱謬
當方面之權恩典由施再叅文雅之選祗膺寵渙彌
切憂兢伏念某世系孤平性識疎闇內惟輪翮之無
取早嘗英俊之彘游抱槩非工濫巾書府伏蒲何補
尸祿諫垣進掌王言靡成深厚之訓對持史簡曾徵
良直之才每慮滿盈果貽謗缺闔門惶懼謝絕親賓
築室逍遙自安藜藿因之就養甘此終身豈期乾坤
再造之鴻恩簪履不遺於舊物起自謫籍付以州麾
奄邁私艱復還故里屬當夷寇倣擾邊陲遽丹詔以
臨門俾墨纒而卽路單車獨進初慙應變以非長元
帥專征乃幸因人而成事以至故關修復首惡遁逃

宣大國之威靈結羣蠻之信誓就擒魁媪并繫孽童
雖名捕之尚遺顧烽煙而稍息願還印綬追襲直麻
遽沐渙恩特加近職將軍旗鼓猥當乘障之居道家
蓬萊重踐育才之地深惟任過過敢忘品題此蓋伏遇
某官體國宣慈代天育物功深構厦廣攬於羣材德
茂調元布和於寒谷永言鄙陋無間甄收謹當董練
武經修明政體奉朝廷畫一之令用致民和宣皇家
無外之風永銷邊隙上答雲天之施次酌衡鑑之恩
過此以還罔知所措

謝再任桂州啓

伏奉恩命特授尚書戶部侍郎依前充集賢院學士
知桂州候今任成資日仍令再任并准樞密院劄子
奉聖旨依前件指揮不許辭讓者伏念某本無遠識
早玷通班向緣蠻事之興遽委州麾之重墨縑從政
徒廢居喪之儀尺籍理兵素乏臨戎之變賴睿謀之
遠照命元帥以專征一戰成功已濫分於賞典三年
奉計當例被於更書忽捧詔音就宣恩旨以謂狂蠻
干紀旣伏於逋誅服嶺頒條宜諳於故俗俾雷州任
庶曉物情再念某頃被中傷嘗居冗散頗得田園之
樂靡思軒冕之榮當警急之期間命敢忘於濡足及

救寧之際私心誠願於退身再露封章上干旒扆未
從報罷仍俾拜嘉此蓋伏遇昭文相公道廣包荒誠
深誘善洪鈞造物靡私動植之恩寒谷迴春曲借發
生之氣致茲樛散荐被龍光謹當詳練武經勵精政
體邊亭警備冀銷桴鼓之音條教布宣庶協蒲蘆之
化上答乾坤之造次酌陶鑄之私過此以還罔知所
措

謝知潭州啓

右某啓伏奉勅命就移前件差遣已於今月二十三
日到任上訖伏念某器非應務才乏適時蓋職淺而

慮昏故毀多而譽少嚮以哀纏風樹歸處丘樊屬當
蠻事之興首預詔除之目三湘假守初令備禦於封
陲五筦董戎遽俾親臨於矢石矧機籌之素惰懼首
領以難全所賴者元帥總其中權邇臣定其遠制乃
容無似於此備員以至大憝遐奔子母不能全其族
外夷協比斧鉞得以正其誅皆上稟於廟謀致甫消
於邊患因之積歲幸免瘝官念婚嫁之失期願珪符
而易地果蒙俞旨還撫舊封顧忝竊以居多實權衡
之有託此蓋伏遇昭文相公明謨特出廣度并容謂
其嘗辱於埏陶未忍遐遺於林藪過形敷奏猶假寵

名敢不祇畏簡書詢求疾隱蠻溪戍嶂圖銷未弭之
兵士里農間期間未康之俗庶展宣風之效庸酬播
物之恩

謝知青州啓

右某啓叨奉聖恩就移州任已於今日二十五日到
任上訖伏念某器能闇淺學術空疎早在屏居分絕
榮路旋由喪次起赴邊防微效莫伸優恩屢及瀕湘
舊國獄訟寔繁嶺海名邦風俗尤古係當委任皆總
偏方授寄則深揆才非稱譬諸毛羽居腹背以無堪
付以藩宣慙股肱之爲重此蓋伏遇某官誠敦與善

義切包荒不求備以取人爲之地而延譽密形獎飾
致竊寵光敢不祇率國經詳求民瘼用圖綏緝以報
恩私

謝知廣州啓

右某啓叨膺睿渥出布藩條祇荷寵光不任感懼已
於本月十八日到任上訖伏念某器非適用智不逮
人初旣謝於才升中亦懼於毀廢間蒙驅策頻易炎
涼謀無補於臨戎寵屢叨於進律去歲載馳驛騎重
見闕庭猥當諭指之行殊乏綏邊之略暨于復命惟
俟黜幽遽陞綱轄之司仍領藩宣之寄下慙猛士徒

守於四方仰愧文昌甫聯於八座此蓋某官義敦與善德極包荒密爲敷揚致茲忝冒敢不體國家忠厚之化寃邦俗利害之源無露才以近名冀順民而成政苟能逃於官謗期勿負於已知

謝轉工部尚書啓

右某啓叨奉聖恩擢遷官品無從遜避徒積憂兢伏念某才謝適時器非經遠幸緣孤直誤記清衷擢自書林超居諫路以至殊鄰專對西掖代言謗篋將盈遺簪罔棄嘗親臨於矢石幸免喪元曾無紀於旂常徒煩拾爵屢統綬於武節又陪貳於文昌比者上聖

登遐真人應運堯仁舜孝百世承基乾健離明重熙繼照俊德旁羅於百辟惠澤廣宣於八紘爰及疎蒙亦叨甄敘此蓋某官曲加題品俯念衰殘列郡承流已忝股肱之寄六曹平奏俾陞喉舌之官謹當祗率政經防弭官謗惟圖死節上報國恩過此以還罔知所措

答淮南轉運段學士啓

右某啓某嚮以瑣材濫躋通籍無沉默之量而克從于衆慕耿介之節而不得其宜天子以法冠彈非諍臣縫闕過是疎遠不預謀議况黜陟之際喜怒難回

武溪集 卷十七
輒陳褻封果觸天憲投棄南服列爲冗官蟪蛄奮臂
誠不量力鷓鴣一枝亦返其分自惟生長草野性仍
寡合進無左右之容退非丘園之秀幸得垂纓抱槩
趨走臺閣遠方之人寧復他望且據權之與失寵孰
爲輕重當國之與孤臣孰爲勢利苟曰樹黨以營其
私則匹夫僮婦猶知所向區區之誠豈在身計而朝
奏暮逐坐爲比周痛哭疾首自明無路冉冉貶所亦
旣逾年庭闈千里不遑三釜之樂忠賢盈朝未賜一
言之佑然則捨生取義尚欲爲之榮通醜窮固非本
志但恐陷此罪罟不爲正人所憐此者伏蒙運使學

士敦樹風義遠錫書教靡誚狂狷猥形賁飾如在寒
谷得逢陽春免爲妄人自今日始儻得天下賢士共
持此談則雖終身窮賤不自深耻某無任云

回兩浙轉運葉學士啓

右某啓生於遠方不達時務疎網在上自觸機關孤
根立朝翻坐朋黨罹此重辟誰爲明之雖蒙聖恩追
還近郡而二親垂白僻在嶠南晨昏旣遙甘脆仍闕
負罪未釋靡敢自陳涉江踰嶺因得私覲間關往還
七千餘里近於秋首方抵所司斗筲祿微管庫員冗
智力俱困正在此時常所交厚悉欲委弃同年道卿

學士靡泐物態再覩手幅交情不移於貴賤善導如
接於風儀感愧已還仰覽無斃仍聆乞閣史筆歸謁
詩庭借聞三釜之樂有踰萬鍾之貴自非淡於榮味
篤在孝愛者孰能與於此哉某親衰蒲柳身陷罽羅
寸心惶惶瞬息增懼儻逢渙汗幸脫羈繫當圖南還
以潔羞膳久服高義願付子臧自誓此誠有如白水
未由覲覲言不盡意

回狀元宋內翰啓

右某啓某賦性魯拙爲學空疎向因舊史之闕文獲
承大匠之諄誨珉玦賤質徒費磨礱甌甃麤材易成

玷闕身與禍會勢無還期不敢復以封題上污恩舊
三年于茲矣近者湯羅一解漢詔甚寬鄉郡長人容
臺進秩皆出望外釋然南歸天慈甫臨家禍已起循
陔之請徒謁肺肝懷章之行遽變縲絰誠願不遂悲
酸倍增豈謂狀元內翰包荒爲懷墜甌猶顧遠損緘
誨下撫窮愁垂照至深仰覽無斃銜恤之外惟知感
恩儻全殘生敢忘厚德

回賀吳內翰啓

右某啓伏審光奉聖恩榮陞禁署伏惟歡慰恭惟審
官內翰佐王遠識經國長才器合金玉之英詞兼江

海之潤宸庭奉對窮精禋而甚微言路推誠判忠邪
而無隱視進退而惟道履險夷而一心嘗遠握於漢
旄誓弗襲於胡服直聲振於蠻貊高節貫於神明猶
以他規亟從外補士頌中和之職民移愷悌之風毋
俟更書遽還綸閣前席帝所當顧問之益隆持橐禁
中增羽儀而爲重官無畱事日告遠猷果從玉笋之
班進保金鑾之直職居要近極爲儒者之榮業茂彌
綸佇正弼諧之任其猥叨郡寄久絕英游豈調謙光
特迂誨畫喜朴交集敷敘奚周

賀梁相公啓

右某啓伏審光膺制命誕告王庭授將鉞之崇資領
帥垣之巨鎮伏惟歡慰恭惟經略太尉相公識窮治
亂業茂經綸至誠格萬物之和一言備四時之氣陶
均庶彙恢陳體國之謨翼亮宸嚴美極濟川之用向
從誠請暫遂均勞隴底綏戎外撫之勲益顯關中阜
俗勤歸之望愈隆將還台鼎之居先正齋壇之拜矧
茲全晉控西北之二陲委以中權靜河汾之萬里併
安危之注意彰中外之一心佇書功於旂常復奮容
於廊廟行躋寵數允副具瞻

回賀孫學士啓

此首在字內翰
後

伏蒙尊慈以榮陞清貫時惠華牋歡慰之餘但增祗
 悚竊以昔漢武用兵四夷朝野多事而嚴助朱買臣
 之徒以文學侍左右內與大臣辨論得失外使四方
 專達詞令然未有職事之稱唐初開秦府以攬英傑
 儲將相之器某幸以寡聞早陪俊軌濫巾綸閣方懷
 糠粃之慙塌翼江風更羨雲霄之舉其於慰怵寧有
 等夷

成化本唐初南秦
 府之不振大行似誌
 墓之文聞入考
 此以不修氣之未定

武溪集卷十七終

武溪集卷第十八目錄

雜文

書譚氏東齋

從政六箴

清箴

公箴

勤箴

明箴

和箴

慎箴

書去虎

契丹官儀

葛懷敏諡議

祭良待制文

祭高待制太君

祭荆王文

祭孫工部文

武溪集卷第十八

宋工部尚書充集賢院學士贈尚書左僕射累贈少師諡襄公余靖著

雜文

書譚氏東齋

人之志於道者在乎去煩釋累靜慮和衷視聽動息不汨不誘然後以居者則安以學者則專自非離塵絕俗不能至於是也吾友譚君伯顧自桂林佐邑遭私艱還第素冠彌時不營他務乃相厥居之東二里而近出氛雜卜岑寂面江倚阜披雲躋險廓地數畝

作爲齋舍上以屏去人事下以訓勵子姓已得其安
子姓得其專有志於道者也屋不加飾地不祈廣蕪
林駕臬自適而已圖史几案旁無長物所謂不見異
物而遷者也丘穰不遐日得瞻睇不忘其親者也吾
友之意深矣一日携僧泛舟而謁之愛其清曠又嘉
其子弟甥姪翼翼如也因書其壁皇祐二年七月日
題

從政六箴

清箴

政爲民綱清本土節立於寡過先乎自潔根不堅固
枝必顛折勿謂何傷多其藏者厚其亡勿謂終吉悖
而入者悖而出金滿堂而莫守玉無脛而能走君子
臨財貴乎無苟計日受祿孰憂不足飲馬投錢孰曰
非賢不義如雲前聖所陳不貪爲寶先儒之道所以
甌雖生塵德及吾民珠能還浦道光信史去惑畏知
千古仰之嗚呼幽有鬼神明有斧鉞貪彼賕餉過乎
豪奪罪盈於貫陽誅陰罰何如砥礪清名不滅

公箴

厥初^生民罔有紀極羣居雜處闡智競力乃建官司
分其曲直所以衡鑑所以糾纏^墨抱公絕私是爲率職

惟柔惟佞腹心之病惟端惟方政化之綱勿畏於勢
受人之制撓法用情爲害不細勿黷於賄移人之罪
鬻獄奉身其禍可待無徇威名以作煩刑嘗聞嚴母
掃墓而迎無貪寬恕以售虛譽又聞晉官稅政者去
張湯輕重其心漢刑已淫州犁上下其手楚邦之醜
是以罪無異罰左史所旌義不隱親叔向之明尺槩
繩直珪方砥平如止水斯鑒不牽於情不侮慝獨無
懼高明其守不更乃國之經敢告君子叅之座銘

勸箴

爵以詔德官惟擇賢怠則職廢勤則政宣恪恭修德

厥德乃全僴俛勵志其志乃專譬如農功日夜思焉
古之聖賢名存簡編其智宏達其謀廣淵猶勉於勤
奉之周旋堯癯舜瘠以臨溥天禹乘四載手胼足腓
日不暇給周道以完介冑蟣虱漢業以安君旣勤止
臣寧曠然周公捉髮九有駿奔趙盾夙興盜退寢門
官無留事史稱名臣罔敢自逸書之格言理有不及
則罹于愆義和酒淫夏攻其昏二王清談晉失其尊
養名通事義和罪人下臣有聞敢告司存

明箴

函血奮氣爭鬪所起區區強弱茫茫眞僞巧詐千端

奸邪萬計或矜其豪以壓顛顛或恃其窮以凌貴勢
或狐託虎威或蚌爲鷁制鼠無牙兮穿墉蝸有角兮
掠地吏或舞文人多飾智聚兔兔以成穴嚇鴛雛而
得味吹毛洗垢極其窺伺滑言柔色肆其諛媚捨狀
探情譬于衡繩邪正區別是爲神明軒銅照膽不將
不迎爾妍爾醜安能遁形敢告有位無忘勵精

和箴

水至清則無魚人至察則無徒凌上忽下於義何如
剛而又方失乎正柔而又圓近於佞濟之中和可以
從政

慎箴

太行之險摧輶折轅龍門之浚舟沉楫翻危乎言路
逾茲阻艱巧者爭進擠之疾顛青蠅止棘讒豈無門
蕙苴似珠謗亦有端所以去惡者如草之蔓履霜者
如冰之堅太僕之馬數而後對温室之樹問而不言
動而三思靜當有慮險則易足謙則無忤根狼則多爭
傲則衆怒好樂者所貴無荒縱欲者終聞敗度語曰
奔車之上無仲尼覆車之下無伯夷古之訓也慎者
從之

書去虎

禺山之陰曰翁來水之源有居邑去刺史府五百里而近山富毒草水蒙毒霧霧昏草黃夏日瘴熱歷者生疾故州人憚之邑老吏恃遠且峻肆詆欺以成俗亡何丞尉飛書白府云境中三虎暴自蹈請以狀聞本朝彰太守服猛擊強之應太守貪僞名欲市其矯乃召他邑掾往驗之以成其詐邑掾到境得疾繇是怒而以實對虎墜筭而死言自蹈者非是邑掾返卧疾且死者久之野史氏聞之廢書而嘆曰罪由古史非丞尉太守之罪也昔者劉琨宋均以循良著治理效史氏有猛虎渡河之說向使政仁且明虎雖在境機埒可制政昏且暴虎雖出境其害被于千里豈特一虎哉則知虎之去不若暴之去太史氏以異聞惑中智甚矣哉

契丹官儀

契丹舊俗皆書於國史夷狄傳矣予自癸未至乙酉三使其庭凡接送館伴使副客省宣徽至于門階戶庭趨走卒吏盡得款曲言語虜中不相猜疑故詢胡人風俗頗得其詳退而誌之以補史之闕焉
胡人之官領番中職事者皆胡服謂之契丹官樞密宰臣則曰北樞密北宰相領燕中職事者雖胡人亦

漢服謂之漢官執政者則曰南宰相南樞密契丹樞密使帶平章事者在漢宰相之上其不帶使相及雖帶使相而知樞密副使事者即在宰相下其漢宰相必兼樞密使乃得預聞機事蕃官有參知政事謂之夷離畢漢官參知政事帶使相者乃得坐穹廬中其宣徽使惟掌宣傳詔命而已文譙侍立如閣門使之比

胡人之掌兵者燕中有元帥府雜掌蕃漢兵太弟摠判之其外則有北王府南王府分掌契丹兵在雲州歸化州之北二王者皆在樞密下帶平章事之上舊

例皆賜御服節度使參於旗幟之南乙室王府亦掌契丹兵然稍卑矣其有居鴈門之北似是契丹別族其坐在上將軍之上又有奚王府掌奚兵在中京之南與留守相見則用客禮大抵胡人以元帥府守山前故有府官又有統軍掌契丹渤海之兵馬軍步軍一掌漢兵以乙室王府山後又有雲應蔚朔奉聖等五節度營兵逐州又置鄉兵其西南路招討掌河西邊事西北路招討掌撻筴等邊事其東北則有撻領相公胡人呼撻字如吞字入聲領音近廩掌黑水等邊事正東則有注展相公掌女真等邊事此皆守邊者也蕃語注展國即女真也

中隨部俗疎大小各有節度使不屬州縣胡人從行之
 兵取宗室中最親信者為行宮都部署以主之其兵
 皆取於南北王府十宮院人充之亦有大內點檢副
 點檢之官以備宿衛北王府兵刺左臂南王府兵刺
 右臂十宮院人呼小底如官奴婢之屬也巡警者呼
 拽刺音力逐部分各有首領及判官等渤海亦有宿
 衛者又有左右等五比室比音牌亦音契丹謂金剛
 為比室取其堅利之名也漢人亦有控鶴等六軍
 胡人司會之官雖於燕京置三司使唯掌燕薊涿易
 檀順等州錢帛耳又於平州置錢帛司榮灤等州屬

焉中京置度支使宜霸等州隸焉東京置戶部使遼
 西川錦等州隸焉上京置益鐵使饒澤等州隸焉山
 後置轉運使雲應等州屬焉置使雖殊其實各分方
 域董其出納也隨駕賜與則樞密院主之讌勞則宣
 徽使主之

胡人從行之官大臣之外惕隱司掌宗室國舅司掌
 蕭氏常袞司掌庶姓耶律氏其宗室為橫帳庶姓為
 搖輦其未有官者呼舍利猶中國之呼郎君也不在
 此籍即屬十宮院及南北王府矣又有十宮院使亦
 從行其言十宮者自阿保機而下每主嗣位即立宮

置使領^五察每歲所獻生口及打虜外國所得之物
盡隸宮使每宮皆有戶口錢帛以供虜主私費猶中
國之內藏也十宮院名

興聖宮 崇德宮 洪義宮 永興宮

積慶宮 長寧宮 延長宮 敦睦宮

章愍宮 延慶宮

十宮院使在上將軍之下節度使之上

十宮院制置司 奉聖州平州亦各有十宮院司
檀州有章愍宮行唐縣屬焉 契丹

司錄事司 如中國
之府司 左右司候司 掌刑獄

胡人於燕京置元帥府統軍馬軍步軍三司胡人東

有渤海西有奚南有燕北據其窟穴四姓雜居舊不
通婚謀臣韓紹芳獻議乃許婚焉衣服飲食言語各
從其俗凡四姓相犯皆用漢法本類自相犯者用本
國法故別立契丹司以掌其獄

葛懷敏謚議

贈大尉葛公生於將門資性明銳束髮從官卽以能
稱形墀贊導五符監督屢更器使人推其才御下不
苛接士以禮輕賫好與重器貴諾官有所底善聲日
聞朝廷寵嘉付以邊事易京之治至今為最屬西羌
情遠辜我含育率其犬羊觸齧保障烽燧初舉卽有

膚施之役鑒其覆軌寤寐材雋是用起於謫籍授之
次將畫野增戍以固封略氏孽孔熾舉國興師來如
蝟毛屯逼城砦言奮其旅出當賊鋒乘銳急戰卒用
屠潰忘軀徇節殞于旗鼓詔贈旄鉞以旌死事祖載
易名式叅前典謹案諡法臨患不忘國曰忠隱議不
成曰隱若其遠當勅寇師無後繼勢寡力屈義不苟
生可不謂忠乎肅將王怒志清戎醜衆怫其令投戈
莫保聞檄痛悼雅意無成可不謂隱乎昔者流矢在
馬魯侯誅之握節隕命晉策褒尚咸用加等式彰義
烈繫公勤死宜諡忠隱謹議

祭段待制文

維康定元年十月癸未朔二十六日甲申曲江余某
謹以清酌庶羞之奠致祭于故廣州知府待制段公
之靈嗚呼天之間氣是生俊德特稟粹精蘊爲才識
應物成務代王修職皇圖所倚譬諸輪翼試之以漸
終將康國量旣未克壽胡不克嗚呼天乎世於祿仕
不羞苟得或枉道以容身或賣聲而借力公之立朝
侃然正色孤根竦幹古之亮直母后專制戚里濫恩
千官結舌暗過天闈公儔抗憤方幅建言雷霆震怒
甘心黜去委吏冗員處之如僚乘驄憲府和鉛書殿

智略再伸周行改觀外臺主計國無貧歲攬轡觀風
鈍頑咸礪南床執法官宿其業簪豸伏墀權豪共懾
粵佐金穀旋登侍從竭誠納忠言行策用暫擁麾幢
殿此海邦鋤姦樹善民夷以康天胡不憖殲我忠良
嗚呼哀哉人之懷才不遭于世或結隙而被誣或抱
忠而見棄旣飲痛而莫伸甘捐軀而自誓猶有生還
故都死去遐裔公今於時不爲不遇直道守官自結
明主暫斥復還帝其玉汝敷歷清顯勤勞靡監旦夕
顧問其仕則膺衆推周才可以鎮遠撫封半載帝亦
悔遣紫泥賜書追鋒給車俾公受代歸侍玉除代公

者誰在湘之湄抗旌卽道朝露先晞公之未去勵精
愈苦遂使忠魂淪喪茲土公之才良無愧廟堂親逢
旦暮而死炎方物理難曉徒怨蒼蒼嗚呼哀哉蠻酋
海客乘風浮舶明月犀象歲至日積昔人北歸不能
弭謗竹簡蕙珠方舟兼量公之戒行朝以俟夕盡室
輕裝十夫之役天若有知延其漏刻俾我後人觀之
爲則庶乎無憾以叶柔克嗚呼哀哉脩短之期蓋有
常數逝川不息藏舟靡固人生至此胡其嘆茹哀公
之喪不得其常弱息乳齒孺婦空房遠託故國未知
存亡哭無由而憑柩斂不及於帷堂謂暫時之一別

武溪集 卷十
遂隔生而可傷昔紫服兮乘駟今丹旒兮還鄉瞻靈輻之祖載痛川途之阻長陳絮酒兮一醅淚霑襟兮浪浪嗚呼哀哉伏惟尚饗

祭高待制太君

惟靈柔明素稱懿恭自飭惟齟及艾終始一德結悅留範誕光女式采繁承祀克勤婦職卜鄰教子適駿家則集此聖善刑于燕翼金華勸講訓成忠翊石窳啓封庸酬慈力福未盈皆壽胡不克嗚呼哀哉修短之策豈其階極吉凶之會曷無常域積善之厚享年不億造物之意終天罔識輶輳啓途銘旌慘色執紼

奠筭橫涕沾軾言瞻蒿里莫知冥默嗚呼尚饗

祭荆王文

惟王系尊帝穆位冠台臣啓宗藩於前世展皇家之茂親敦叙之恩流於國邸對見之禮厚於家人推勲賢之莫二冀屏翰於無垠溘委朝露愁生暮雲宸懷爲之一慟民思從於百身蓋棺長夜引紼斯辰國門之祖牲羞以陳永歸蒿里義愴朝紳嗚呼尚饗

祭孫工部文

惟靈黟山之英生爲俊明學探聖域詩合雅聲再以科進列于王庭豸冠霜簡凜凜持平繡衣朱旆未足

于外二易江城直道無悔粵惟前載寇攻南海烽火
飛騰巖隅震駭君乘使車聞急驚呼不俟王命遽發
銅符救兵先集團城不孤番禺無虞惟君之踰帝曰
汝材將漕來此盜據邊關旁無儲峙元戎秉鉞貔貅
千里餉餽不續許之以死君運心計委粟流錢士免
饑色凱歌以旋幕府第勞郎曹再遷當享遐福胡不
末年嗚呼哀哉君於場屋名出輩流作椽南昌始與
君游柔圓易安剛方多滯假守廬陵朱輪相繼生叨
郡寄君領監司再任相逢哀樂是隨君哭吾父我哭
君身嗟嗟世人糾纏相因聊陳薄奠以告營魂茫茫

九泉孰聽斯言

武溪集卷第十八終 十月廿日校